

## Osaira Muyale cu un expression artistico di e historia di nos cabay

**No ta usual cu den NotiOCA nos ta hasi entrevista**, pero e biaha aki un circunstancia hopi special a urgi nos pa papia cu e artista **Osaira Muyale** riba su investigacion riba e origen di e number y e historia tras di nos haf principal "Paardenbaai".

**Osaira** a nace den un wieg, cuida pa su mama Hulandes y su tata Rubiano, cu un influencia equino fuerte y prominente. Esey a bira e fruto pa su creacion na 2013 na Museo di Zwolle, presentando un cabay drumi y parti den dos. Cu esaki el a ilustra su bida hibrido di dos diferente cultura den cual ela lanta bou di su mayornan Tito, p.e.p.d. y Femmy.

**Osaira** a haci sondeo hopi profundo cu ta bay bek na storianan bunita cu ta data for di 1500. Na 1515 Diego Salazar a transporta 2,000 indian di e islanan ABC pa e isla di Hispaniola (Republica Dominicana/Haiti).

Ora cu Juan de Ampues a bira gobernador di nos islanan na 1526, ela trese algun Indian bek for di Santo Domingo, hunto cu nan a bin tambe bestianan Europeo, manera cabrito, carne, baca y claro cabay. **Osaira** a conta nos cu el a saca esaki for di e buki "Historia di Alto Vista 1500-1952", skirbi pa pastor Nooyen O.P. **Osaira** a busca tur buki y info posibel di hendenan for di tur caminda, incluso di nos localnan, kendenan a haci un trabou estudioso, caminda ta aparece entre otro e existencia di cabay na Aruba.

Domi Protestant Bosch a conta su experiencia masha bunita di e yegada di cabaynan na Aruba den su buki "Viahanan pa West-Indie". E ta splica den detayes con un barco, carga cu cabay, igual cu e barconan cu ta transporta esclavos. E proceso tawata bay lo siguiente; riba e beach na Paardenbaai e negociador di cabay ta para cu un cabay mirando e yegada di e barco. E cabaynan abordo ta mira e cabay na tera y claro e comunicacion di relinche entre e cabaynan ta haci e coneccion necesario. Ora cu e barco ta suficiente cerca 2 tipo cu forsa manera Hercules ta pusha e prome cabay for di bordo den laman y esaki den forma automatico ta cuminsa landa bay tera, den direccion di e cabay na tera. Esaki ta habri caminda pa sigui cu e di 2, 3, 4 cabay, etc. E domi ta sigui splica cu despues di a huma 2 sigaria, tur e 30 pa 40 cabaynan a yega tera y ta comiendo e yerba riba e beach. E domi ta conta cu el a cumpra e cabaynan aki di Don Esteban Beola, un decendiente di Guipuscoa, Spaña. E tabata biba riba e hemisferio Sur Americano ora cu e revolucion a cuminsa y el a bin establece su mes na Aruba, caminda el a keda biba pa mas tranquilidad.

Como parti di e proyecto pa duna Aruba un stempel historico, **Osaira** hunto cu e Ministerio di Cultura y Turismo lo instala un total di 8 cabay rond di Paardenbaai. Nos por menciona cu e prome un lo bin dilanti di Royal Plaza na e otro banda di caya, manera cu e ta saliendo di laman. Dos cabay lo bin riba Plaza Daniel Leo, un tercer banda di kerki Protestant. Un otro banda di e ex-Havenkantoor. Cada cabay lo ta color blauw y nan lo tin e tamaño real. Tur e cabaynan lo ta diferente, pues tambe cu nan propio number y cu un storia apart. E prome cabay lo keda instala dia 30 di e luna aki.